




SA MATA PRESUMIA






Una bia, in una bidda manna, biviat,
sola sola, una matigedda pitica



Custa mata fut in una prassa ingiriada de
domos artas artas



Fut in beranu, s'àera fut tèbida
e sa matigedda fut cuntenta
meda, poite ogna dì nde ddi
essiat una follitedda noa




Sa mata però non boliat ci nemos s'aprobiarit a
is cambus suus poite timiat ci sa folla
s'orrovinarit.

Po cussu, is pigioneddos furint arrenegaus e is
calagagus pilisaus



Peri is macitus nci furint abbaraus mali,
poite totus iscint ca portant is pees de
velludu!







In s'istadi is follas de sa
matigedda si furint
fatas bellas, lugentes e
fortes. Sa matigedda
fut bregiosa a beru



Ma però fut arribau
s'atongili, cun nuiis nieddas
prenas de abba e sa
matigedda iat bitu una cosa
impossibili...



Totu sa folla de is
cambus suus fut
torrada groga!



Poi, comente ci non
bastarit, totu sa folla
si ddi fut sicada e nde
ddi fut calada a terra
Sa matigedda fut
disisperada!





Biendo aici iat cumenciau a
pràngiri, pensandu de
s'èssere ammalaidada e de
istari mali...

Po fortuna,
pròpru in cussu
momentu fut
passandu bie
incuni Ada, una
corraga bècia



Ada, cun passiènsia, dd'iat spiegau comente furint is stesones. Dd'iat narau ca is follas suas ciai iant èssere torradas a nasciri in beranu, prus fortes e bellas de prima.

Tandu sa matigedda presumia dd'iat sensada de pràngiri e iat impromìntiu una cosa:





Candu in beranu totu is
folliteddas suas iant
èssere torradas a essiri, iat
àiri invitau is pigiones, is
maciteddos, is sissigorros,
is grillus e is calagagus,
totus ma pròpriu totus, a
una festa in pissu de is
cambus suus. E aici iat
fatu!